

Parare Domino Plebem Perfectam

A lokisetse Morena Sechaba se phethehileng (Luka 1,17)

# Moeletsi oa Basotho

www.moeletsoabasotho.co.ls

Matjato o  
sebelisa  
thepa



2

Lekala le  
tlatsetsa  
likolo

7



ETL le VCL li  
fana ka matsatsi  
a mohau

12




## LEBESA H'A ITHEKE MOROALO

3

www.moeletsoabasotho.co.ls

Moeletsi oa Basotho



Re se re fumaneha ho marangrang

Email: newsroom@moeletsoabasotho.co.ls  
Tel: +266 28350466/ Whats app: 62600983



# MOELETSI

Ho molemo ho roalla le sa sele

## Matjato o sebelisa thepa e fetohileng mathethebale

Litichere li ile tsa kena boitsekong lilemong tse fetileng 'me taba eo e ile ea ama thuto haholo, eaba kamor'a moo ho fihla seoa sa COVID-19, likolo tsa koaloa. Kajeno re utloa hore esale ho e-na le likheo tse ngata tsa litichere likolong mona tse sa tlatsoeng. Ho na le batho ba imeloang ke mosebetsi hobane ba ruta sekolo ba le bararo. Ke tlasa maemo afe ho etsahalang ketsahalo ea mofuta ho na e-na le bacha ba bangata hakaalo ba phethetseng lithuto tsa bona Sekolong sa Koetliso ea Litichere? Ho thata ho utloisisa hore ebe ho na le tlhokahalo e ngata hakaalo ebile ho e-na le likolo tse nang le palo e ngata ea litichere.

Ka lehlohonolo la moteaphala 'muso o arabetse tlhoko eo ka ho hira litichere tsa nakoana ho thusetsa ba teng. Ntho ena e bitsoang lihala-hala ea thusa empa joale potso ke hore hobane'ng batho baa ba hiroa lilemo tse hlano feela? Ke ka lebaka la'ng ho sa hiroe litichere tse hlokalang hobane hoa hlaka hore tlhoko e teng? Barutoana bao ba tlo sala ba le mahlomoleng hakaakang mohla litichere tseo tsa lihala-hala li tsamaeang. Bothata bo hokae ka pusong hore bo ele hloko bohlokoa ba thuto haholo likolong tsane tlaase mo e leng motheo? Ha re tla tabeng ea ho koetlisa le ho otlala ngoana ho tloha qalong, re lokela ho rolela litichere tsa Likolo tsa Mathomo khaebana hobane ba etsa mosebetsi o tsoileng matsoho ebile o se bonolo. Joale ba tla etsa mosebetsi oo joang haeba motho a ruta lihlophahali?

Banka ea Standard Lesotho (SBL) e entse ntho ea bohlokoa haholo ka ho tsoarela bahoebi sethala sa ho bapatsa le ho rekisa lihlahisoa tsa bona. Ba bileng le seabo ba hapile meputso ho latela hore na motho o hlahile boemong bofe. Ea hlahileng maemong a pele o tla emela Naha ea Lesotho litholisanong tse tla tsoareloa naheng ea Kenya. Rea mo lebohisa ka mpho eo, re na le tšepo ea hore o tla e sebelisa hantle ho thusa le ho holisa mosebetsi oa hae. Morena Molimo a mo pepe ho ea le ho khutla, 'me a tlele Basotho le Lesotho tholo eno. Empa ka holimo ho tsohle a ithute mekhoa e fapakaneng ea ho tsamaisa khoebo bathong ba bang.

WFP ka lithuso tse tsoang naheng ea Monaco e nkile boikhatatso ba ho thusa Likolo tsa Likonyana le tsa Mathomo Literekeng tsa Quthing le Mohale's Hoek, tse hloahiloeng li angoe haholo ke taba ea boemo ba leholimo e bakileng bofuma. Taba ena e tla thusa barutoana ba neng ba se ba sitoa ho tla sekolong ka lebaka la ho hloka seo ba se jang, ha ba bang mohlomong ba ba e-tla sekolong ebe ba sitoa le ho tsepamisa maikutlo holima lithuto hobane ba ba ntse ba nahana ka lijo.

Thupa ena e otlolloang esale metsi e tla hola hantle e fumane thuto ho tloha mathomong, hobane eona palesa ke bokamoso ba naha. Ntle le bona e tla ba ke ho fela ha sechaba sa Basotho. Litichere tse rutang likolong tsena li tlameha li le motlotlo haholo hobane ba bona masisapelo letsatsi le letsatsi. Kaha ba fetoha batsoali ba bana, sohle seo ba fetang ho sona ekaba 'meleng kapa maikutlong sea ba ama le bona. Ba tla tseba ho ba ruta ba lokolohile bonyane ba tsena 'muso o mona o sa kolotoeng oa mpa, o fumane thuso.

Batsoali le lona le hopole ho etsa karolo ea lona kholisong ea thaka ena, hobane litichere li ka se etse mosebetsi li le ling. Sesotho se re, "ngoana ke oa motse kaofela" motho e mong le e mong o kenya letsoho kholisong ea ngoana ofe kapa ofe leha e se oa hae oa letsoele.

### Nthabeleng Seitlheko

**Letona la Mosebetsi e Meholo le Lipalangoang, Mohlomphehi Neo Matjato Moteane, o thakhotse letšolo la Titima, Nazareta Ha Nqheku, ka la 29 Pherokhong monongoaha.**

Letšolo lena ke moo lekala le tla sebelisa thepa ea 'muso (Yellow Plant) eo e sa le e rekoa khale empa e le mathethebale e sa sebelisoe, eona e tlo thusa metseng le metsaneng ho

sechaba se tla ikholla bofumeng 'me bophelo ba sechaba ka kakaretso bo tlo ntlafala ho kenella kahar'a metse le metsana.

Motlatsi oa Tona-Khoho Justice Nthomeng Majara ha thakhola tšebetso ena, o bontšitse hore khaho ena e tlo etsoa holima tsela e teng ho e fa sebopelo le ho e bopa bocha ka mechini ea Lekala ka Lefapha ka Roads Directorate.

Tšebetso ena e tšehelisoa ka lichelete ke 'Muso oa Lesotho ka Lekala la Mosebetsi e Meholo ea Sechaba le Lipalangoang,

likilomithara tse 23 'me e tlo ama metse e 18. Tokiso ena e tlo nka nako ea likhoeli tse robeli 'me e tlo qala ho kena tšebetsong ka la 29 Loetse monongoaha.

E mong oa baahi, 'Maseboka Moleko, o itse tsela ena e ne e sa tsamaee ho hang ka lebaka la ts'enyoo e bakiloeng ke lipula tse ngata, 'me ho fihla libakeng tse ling e ne e le bothata kaha metse e arohane haholo. A re ba ne ba nka maeto a malelele ho fihla boemong ba likoloi hobane likoloi li se li sa kenelle libakeng tse ling. O re ba leboha 'muso



Letona la Mosebetsi e Meholo le Lipalangoang, Mohlomphehi Neo Matjato Moteane.

lokisa litsela tse angoeng ke lipula.

Moteane o boletse hore ba ikeletse hore ba kenye tšebetsong mechini e neng e le teng tlasa Lefapha la Roads Directorate, ha lekala le se le bone hore e sebetsa hantle, le tla kopa keketso ea mechini hore e anele litikoloho kaofela kahar'a naha.

A re sechaba se phelang tikolohong ena, se tlo imona menoana kaha tšebetso ena e tlo hokahanya litereke tse peli e leng Berea le Maseru. A supa hore e tlo hlahisa mosebetsi, litšebeliso li tlo akofa ka hona

'me Lefapha le ikarabellang khahong le tokisong ea tsela ena ke Roads Directorate, ebile e le lona mokonterata ka Lefapha la Titima tlasa Central Region. O boetse a tsoela pele hore tsela ena e tlo ba bolele ba

ka ho ba hopola nakong ena e thata, hobane esale ba le seboko ke maemo a litsela a hloabaesang, 'me ba lebaha hore le mosebetsi e tla hlaha kaha e le qholotso e kholo e tobaneng le sechaba sa Basotho.



Motlatsi oa Tona-Khoho Justice Nthomeng Majara.

Contacts: +266 28350 466 / 6260 0983 (Whats app)  
Email: moeletsioabasotho@gmail.com

**MOELETSI oa BASOTHO**  
A LOKIBETSE MORENA SECHABA SE PHETHEHILENG (LUKE 1:17)

### Editorial

Lesoetsa Rakubutu (Editor)  
(+266) 58490670 / 62031949  
editor@moeletsioabasotho.co.ls

Lehlohonolo Mohale (Sub-editor)  
(+266) 58 771 507 / 62 771 507  
subeditor@moeletsioabasotho.co.ls

### Newsroom

Nthabeleng Seitlheko 57 665 038/ 68 216 721  
nthabeleng.seitlheko@moeletsioabasotho.co.ls

Tšelisio Thakholi (Sports) 58 540 853/ 63 480 404  
tseliso.thakhuli@moeletsioabasotho.co.ls

newsroom@moeletsioabasotho.co.ls

### Advertising

Thabo Lesaona  
(+266) 28 350 466/ sales@moeletsioabasotho.co.ls

### Production Desk

'Mateele Liqa, Sr. Canicia Nthunya



# Lebesa h'a itheke moroalo

## Nthabeleng Seithheko

**M**oemeli oa Bacha Komiting ea naha ea Kobo-Tata (ABC) Mphonyane Lebesa, o kenetse mojao oa ho ba Raliphatlatso oa ABC, kaha ebile Raliphatlatso Komiting ea Bacha ka nako e telele, a ntse a loanela seriti, bonngoe, kopano le kholo ea ABC. Tsena o li boleletse Koranta ka mohlala ka la 1 Hlakola monongoaha.

O re o kenela mojao ona hobane a rata hore a tle a fuoe boikarabello bo feletseng ba ho tsamaisa ofisi e joalo, kaha ka lilemo-lemo a ntse a e tšehelitse. O re mosebetsi oa ho buella ABC o ne a o qale ka selemo sa 2015, 'me o tla sebetsa ka matla ohle ho aha Lekhotla la Kobo-Tata ka boitelo le boitebalo ho feta pele, etsoe ha ho na mohla a ka fetohelang thomo ea e filoeng ke sechaba.

Lebesa o re boemo ba ho ba Raliphatlatso bo hloka motho ea sebete kaha le litšoso a ka thulana le tsona ho latela liet-sahala tsa naha, ka hona o tla hopola hore o eme le bongata ba Basotho 'me o tla ema leha tau e rora.

O bontšitse hore o tl'o loanela ho bona hore ba ba le sehlopha se sebet-sang le bophatlalatsi, se sebetsanang le ho beha litaba tsa lekhotla kapel'a sechaba ka nepo hobane bao ba tla be ba fuoe lithupelo e le hore ba bue litaba tsa Kobo-Tata tse tšoanang ebile li aha bonngoe le kopano. A re ha batho ba ea bophatlalatsing ba ahile tsela e le 'ngoe ea tšebetso taba eo e ba thusa hore ba se ke ba senyeheloa, empa ba sebelise matla a bona le litsebo tsa bona ka tsel-la e nepahetseng.

A re ba lokela ho bua

puo e le 'ngoe e seng ba bakele lekhotla mofere-fere, ba bue litaba tsa 'nete tse nang le chebelo pele eseng ba bue ka litaba tsa bona ka bo mong. A re ba boele ba be le neheletsano ea litaba ka litsela tsohle molemong oa ho aha bonngoe le kopano ea ABC.

O supile hore ke taba-tabelo ea bona hore ha ba filoe boikarabello, ba bone hore ba hlaola liphoso tsohle tse bileng teng, ba fetohle letsoai kahar'a mokha ba lule ba hopola lentsoe la bakhethi eseng litaba tsa bona. A re ho bohlokoa hore ba lule ba ntse ba mamela ho utloa hore na litaba li tsamaea joang mabatoeng, ba sebetse litaba tsohle ka mamellano ba khaotse liqhoebe-shano ba behe lekhotla la ha bo bona pele.



H'a phethela o supile hore tebelo ea bona ke hore ha ba fetile khetho ea Komiti e Kholo ea Mafumahali, ka la 24 ho

isa la 25 Hlakola monongoaha e tla ba khetho ea Komiti ea Bacha e tla lateloa ke Komiti e Kholo ea naha. A re ba

hlotsoeng ba amohela, ba hlotseng ba tsebe ba khethiloe ke sechaba ba se mamele molemong oa kholo ea ABC.

# YES e ithomella Letšeng

## Nthabeleng Seithheko

**M**oetapele oa Mokha oa YES, Molefi Ntšonyana, o ngoletse morao oa Letšeng Diamond lengolo leo ka lona a supang e le phoso hore ebe morao o iketsetsa litšebeletso tsa ho rafa litaemane. Tsena o li boleletse Koranta ka la 31 Pherekhong monongoaha.

Lengolong le tekenetsoeng ke Ntšonyana, le hlalosa ha molao oa lirafshoang oa selemo sa 2005, ka temana ea 11 o re litšebeletso tsa ho rafa li lokela ho etsoa ke Basotho, 'me tokomane eo e tataisa likhoebo hore na li lokela ho sebetsa joang kahar'a naha le Basotho. O re khale ba mometse ho tloha ka la 15 Pulungoana ngoahola, ba shebile hore na ho na le mekhatlo kapa Mosotho ea tla nka khato litabeng tsena empa ho ntse ho se nko ho tsoa lemina.



O re ba tl'o nka khato ka ketsahalo eo empa ba hloka morao o ikobebe molao oo, o be o lokise phoso eo matsatsing a 14 a tšebetso, 'me e bang ho sa be joalo ba tlo o nka ka lechoba hobane mosebetsi oo ke oa Basotho.

A bontša hore ho ea ka molao oa naha ena ho loke-la hore thepa eohle, 'moho le litaemane ha li tsoa kahar'a naha ena li sireletsoe ke Basotho le lifofane ho sebelisoa tsa bona, ka hona taba ena le eona ba ntse ba tl'o e nkela likhato, hobane seo ba se hlokang ke hore Basotho ba eloe hloko.

Ntšonyana o re Lets'eng ha e ne e hlokomela hore e se etla khaola maqhama a tšebetso le Matekane Group of Companies, e lokela hore ebe e ile ea etsa phatlalatsi ea mosebetsi oa boiketoto, eseng e etse qeto ea ho irafela le ho reka thepa ea mohoebi eo. O re hona ke sekhoqetsane se sebelisitsoeng ho koala Basotho mahlo, joalokaha eka lintho li nepahetse ho se joalo. O re mosebetsi oa ho rafa ke oa Basotho, 'me likhoebo tse kholo li lokela ho arolelana mosebetsi le tse teng kahar'a naha eseng li ikoale ka ona.

H'a phethela o re h'a na ho phomola, o tl'o sebetsa ka thata ho sireletsa lihlo-liloeng tsa naha ena tseo boholo ba tsona barui ba ratang ho una molemo oa tsona ba le bang, ba sa n-tse mafutsana kapa bahoebi ba tseng ba thuthuha.

Lengolo lena le qhololitsoe ke qeto eo morao o ileng oa e nka ea ho reka mechini eohle ea kampani ea MGC kamor'a ho khaola maqhama a tšebetso le Letšeng Diamonds, kaha mong'a eona e se e le Tona-Khoho ea Lesotho ho ipapisitsoe le temana ea 59(1) ea molao oa motheo oa naha.

Lengolo lena le ngoletsoeng Letšeng Diamonds, le fihlile sebakeng seo ka la 31 Pherekhong monongoaha, ho bontša kamohelo ea lona le bile le tlapisitsoe ka setempe sa kampani eo. Koranta e lekile mekhoha eohle ea ho fumana lehla-kore la ba ngoletsoeng moo ea ikarabellang Ofising ea Liphatlalatsi e le Motlatsi Justine Mokere, a supileng hore ke hona a tla netefatsa litaba tsena ho beng ba hae, leha ho le joalo, o ile a re kopa ho romella 'email' ho mong'a hae, empa ha a e-s'o e arabe ho fihlela ha joale.



# Mocha ea ipabotseng ka leruo la likhoho

**Tšeliso Thakholi**

**K**ajeno koranta e lakalitse hore e qoqe le e mong oa bacha ba iphelisang ka leruo la likhoho tsa Sesotho, tsa mofuta oa Likoekoe, e leng Abuti Monongoaha Pelei oa motseng oa Riverside, tikolohong ea Mazenod, eo e leng moithuti ka Sekolong se Seholo sa Sechaba(NUL). Boipiletso bo boholo ke hore bafani, 'muso le sechaba ka kakaretso ba kenye letsoho ho tšehetsa likhoebo tsa bacha, e le hore ba tsebe ho itšematlela hang ha ba qeta likolong ka ho fapana ha tsona.

**Pale ka se ileng sa mo khotaletsa temo le leruo la likhoho**

Ha ke ntse ke le ngoana ke ntse ke kena sekolo, ha ho na mohla ke ileng ka bona batsoali ba ka ba reka phofo lebenkeleng. Ke hotse ke phela ka temo le leruo la likhoho, che le hoja ka nako eo li ne li ruoa feela bakeng sa nama, e seng ho li fetola khoebo eo re ka phelang ka eona. Ha ke qeta Sekolong sa Mathomo le se Phahameng, ke ile ka bona batho ba bangata ho hlaha ka likhoroana tse fapakaneng ba e-tla lapeng mona, ba tliil'o reka likhoho. Ba ne ba hliile ba li reka ka bongata ka mabaka a fapakaneng, 'me ba bang ba ne ba li rekele ho li rekisa, ha ba bang bona ba li rekela bakeng sa nama.

Ke moo ke ileng ka ithuta hore bophelo bo teng likhohong tsena tsa Sesotho tsa Likoekoe. Hape ka ikutloa ke e-na le thahasello le lerato la ho li fetola khoebo le ho kena ka matla ho eona. Ka qala ka li ruoa ka bongata le ho li rekisa ho fihlela kea Sekolong se Seholo sa Temo, ke ntse ke phelisoa ke tsona le ho arabela tse ling tsa litlhoko tsa ka lapeng.

**Ho qaleha ha tšehetsa ea ka**

Hantle ke qalile ho li ruoela khoebo ka selemo sa 2019, leha ke ne ke e-s'o be boemong bo pha-



hameng haholo ba 'maraka, kaha morero oa ka ne e le ho li ntlafatsa pele, empa ka qetella ke se ke inehetse ho ka ho li rekisa, hobane ke ithutile batho ba bangata ba li rata ka lebaka la nama ea tsona e monate le ho fepeha ha bobebe. Ha li sokolise joaloka tsena tse ling tseo re li rekang e le litsunya. Ke 'nete le tsona li ntse li hloka tlhokomelo e kholo. Khoebong ena e ncha ke ile ka e kopanyelletsa le temo ea lijo-thollo kaha ke ne ke bone hore le ho eona bophelo bo teng. Ka selemo sa 2020 joaloka likhoebo tse ling tse ileng tsa an-

goa ke COVID-19, khoebo ena ea ka ha se mokhelo, e ile ea 'na ea ameha feela e seng haholo hoba ka lehlohonolo batho ba Mazenod le mathoko a eona, ba ne ba ntse ba e-tla ba tliil'o reka. Che, le hoja e ne e se ka bongata bo boholo. Teng e itse ha seoa sena sa COVID-19 se fela, batho ba ile ba boela ba tla ka bongata le ho fihlela hona joale.

**Boiphihlelo leruong la likhoho**

Kamor'a hore ke matlafetse likhoho tsena tsa ka, ke ile ka li ahela matloana a tsona a ntlafalitsoeng ka mokhoa oa sejoale-joale.

Ka qala ho hira motho eo ke sebetsang le eena. Ka bula lekalana le leng la thekiso ea likhoho Sekolong sa Temo, ha le leng le ntse le le Riverside, Mazenod. Leha liqholotso li ntse li le teng mona le mane ho fihlela ha joale tšebetso e ntse e tsamaea hantle, kaha theko le tlhahiso li ntse li tsamaea hantle. Ka lebaka la ho fumana tšehetso e kholo ka lapeng, 'maraka e batla e se bothata, ho ba tšehetso ke e fumana ho tloha tikolohong ea heso le mathoko a eona.

**Khotaletsa ho bacha**

Bacha ba heso mehla e fetohile, ke nako joale ea hore ha re etsoa likolong kapa re sa ea, re ikopanye re ithehele likoporasi kapa likhoebo tse kholo, tse tla re thusa ho loantša bofuma le tlhokahalo ena e phahameng ea mesebetsi. Ha re se keng ra emela ho hiroa hoba mesebetsi hona joale ea sokolisa. Ha ho hlokahale le hore re ka tlala metseng e meholo ea litorotsoana tsa Lesotho ho ba sena se ka baka tšubuhlellano le littlo tsa molao li ka phahama. Ha re ntse re le hona metseng ea habo rona, ha re shebeng mekhoha e bobebe ea ho iqalla likhoebo. E be re kopa tšehetso ka malapeng le ho bahoebi ba phelang libakeng tseo re leng ho tsona, hore ba re thuse ho ichehela tlhapi e seng ba re fe tlhapi.

**Bokamoso ba khoebo ea hae**

Pono ea ka ka khoebo ena ke ho bona e holiile ho feta mona, bacha ba bangata ba fumana mesebetsi ka lebaka la rona. Hape ke rata ho bona e fetola bophelo mafapheng a fapakaneng, e kaba a temo kaha likhoho tsena li hlahisa manyolo, ho ja nama e monate e se nang litlamorao tsa mafu le ho reka ba il'o ithekisetsa.





# WFP e thakhola phepo ea bana likolong

## Nthabeleng Seithheko

**M**okhatlo oa Lefatše oa Lijo (WFP), Unicef le Lekala la Thuto le Koetliso ka tšehetso ea lichelete ho hlaha Monaco, o thakhotse morero oa lilemo tse peli oa phepo e nepahetseng likolong tsa Likonyana Ha Mohlakoana Quthing, ka la 29 Pherekhong monongoaha.

Moemeli oa WFP Lesotho Aurore Rusiga, o bontšitse ba le motlotlo ka tšehetso eo ba e filoeng ke Mookameli oa Monaco, hobane e t'lo thusa ntlafatsong le kholong ea bana e nepahetseng. A re Naha ea Lesotho e tobane le qholotso ea phetoho ea boemo ba leholimo e bakang khoholeho ea mobu, komello le likhohola, 'me sena ke karolo e 'ngoe e bakang tlhokahalo ea lijo.

A re tlhokahalo e holimo ea mesebetsi le palo e phahameng ea bana ba nang le bokakachelana ke 34.5%, 'me ba lilemo ho tse ka tlaase ho tse hlano. A re boholo ba batho ba tobane le litheko tsa lijo tse phahameng, 'me li imela bahloki ba seng ba ntse ba kolla ntsi hanong.

A re e le ho fihlela liphelelo tsa moshoelella (SDGs) ba lokelela ho tsoarana ka matsoho e le mafapha ohle a sechaba, ho tla ka maano le meralo ea ho kholla sechaba bofumeng. A re morero o t'lo sebetsa likolong tse 36 tsa likonyana, ho fepa bana ba 580 Quthing le Mohale's Hoek, lihoai tse 300 li tla una molemo ka ho rekisetsa likolo tse joalo lijo, hobane tšehetso ena e t'lo phethahatsoa ka lijo tsa lihoai tsa lehae.

Moemeli oa UNICEF, Kimanzi Muthengi, o re bophelo bo botle ba bana bo hlalisoa ke litholoana tsa phepo e matlafetseng hobane hoo ho hlola mafu. O re ba ikamahanya le tumellano e entsoeng lefatšeng hore ba sebetse 'moho, e le mekhatlo ho loantša litaba tsa tlala le bokakachelana. O re ke taba-tabelo ea bona hore ho tle ho kenyeletsoe manane a mang a ntlafatsang thuto ea litaba tsa bophelo bo botle Likolong tsa Likonyana le ho tsa Mathomo.

O re UNICEF e kenya letsoho kholong ea bana, ho tloha tlhahong ea bona ho fihlela ba le lilemo li robong, lilemong tseo ngoana o lokela ho fumana litšebeliso tsohle tseo a li hlokanang. A re kanyeso e ntlafatsa litaba tsa phepo e nepahetseng h'a qeta ho hlaha e le ea 'M'a eseng lebeso le rekoang, 'me e bohlokoa ngoaneng.

Mofani ho hlaha Monaco



Mookameli oa WFP, Aurore Rusiga

Bénédicte SCHUTZ, o itse bona ke naha e fokolang 'me Lesotho ke naha ea pele eo ba e tšehetsang, ka hona ba e eletsa ho shebana le litaba tsa phepo e nepahetseng le tlhahiso ea lijo, ka hoo bonyane 40% ea bona ka selemo ba e tsetele kahare ho tlhahiso.

A re ba shebane le phepo ea Likolo tsa Likonyana, moo bana ba lokelang ho ja litsoa-mobung e le karolo ea ho tšehetsa lihoai tse nyenyane. A re ba boetse ba tšehetsa ntlafatso ea basali le bana, haholo bana ba feptjoang ka tlhahiso ea lijo malapeng, ba bile le mananeo a mangata a ipabotseng ka ho etsa phetoho litabeng tsa phepo ea bana likolong.

A bontša ba rata hore har'a tse ling ba tle ba kenyeletse litichere le batsoali, kaha e le bona ba bonang hore bana ba teng kahar'a likolo, a boela a tiisa hore ha se taba ea ho ja feela empa ba kene sekolo. O re o tla tšehetsa WFP nako ea lilemo tse 'ne, o lumela hore morero ona o tla thusa baetapele ba kamoso hore ba be le tlhahiso ea lijo.

Lebitsong la Lekala la Thuto le Koetliso Thuto Ntsekhe, o hlalositse hore lekala la habo le thakhola morero ona nakong eo naha e keneng letšolong la ho kenya moea oa lerato la thuto ho baithuti bohle ka ho ba abela limpho le ho ba tšehetsa maemong ohle. A re ba motlotlo hore bana ba tla matlafatsoa

ka phepo e nepahetseng eleng se tla tliša thahasello ho ba neng ba se na eona hore ba kene sekolo.

O re selemo sa 2024 se phatlalalitsoe ke UNESCO e le sa thuto, 'me se phatlalatsa tjena, naha e ketela lilemo tse 200 sechaba sa Basotho se thehiloe. A re bana ke bokamoso ba naha 'me sechaba se se nang thuto sea timela. A bontša hore 43% ea bana e na le bokakachelana, 40% e atlehile ho kena Likolo tsa Likonyana ho tloha ho lilemo tse peli ho isa ho tse hlano.

O re phepo Likolong tsa Likonyana e bohlokoa hobane le bao ho se nang lijo malapeng a bo bona ba atleha ho kena sekolo ka bolokohi, ka

hona sena se t'lo natefisa thuto ea bana likolong le lerato la sekolo. A re selemo le selemo 'Muso oa Lesotho o etsa likhakanyo tsa lichelete ea M200millionne sebakeng sa phepo ea bana likolong, joale ba se ba rata hore lihoai li hlalise ka matla e le hore chelete e rekang lijo ka ntle ho naha e tlišoe matsohong a bona.

A re ke takatso ea bona hore 80% ea lijo tse jeoang kahare ho likolo ebe tse tsoang masimong a Basotho.

Mookameli oa Sekolo sa Mathomo sa Bolula, Masalemone Koloifofo, o itse morero ona o t'lo ba thusa hobane karolo e 'ngoe ea baithuti e tla sekolong e sa ja, ka lebaka la tlhokahalo ea lijo malapeng, ba bang ba qetella ba sa kene sekolo hobane ba se na lijo kapa lithoko tsa sekolo, 'me bana ba t'lo atleha ho kena sekolo ka bongata. A re bothata ke tlhokahalo ea mesebetsi e tjametseng malapa a mangata, ka hoo ba t'lo atleha ho abela lithoko tsa bana ba bona likolong.

A re ba motlotlo hore ebe ho khethiloe likolo tsa habo bona, 'me sena se tla iponahatsa ka tšebetso e ntle lihlopheng le ho phahama ha sephetho Seterekeng sa Quthing, hobane bana ba tla be ba koenne ho lekana.

Morero ona o tla sebetsa ho tloha 2024 ho isa 2026, Mohale's Hoek (Lithakaling) le Quthing (Ha Mohlakoana), kaha e le libaka tse hloailoeng li le tlókotsing ea ho angoa ke phetoho ea boemo ba leholimo, komello le likhohola.

Ke bonyane 34.38% ea bana likolong tsa Mohale's Hoek le Quthing e tla una molemo morerong ona, Likolo tsa Likonyana tse 36, Likolo tsa Mathomo tse 14 ka barutoana ba 2,290.



Ea emetseng Lekala la Thuto le Koetliso, Thuto Ntsekhe



# Lekala le tlatsetsa likolo ka lihala-hala

## Nthabeleng Seitlheko

**E**le karolo ea ho arabela selo sa baokameli ba likolo sa nako e telele sa tlhokahalo ea litichere likolong, Lekala la Thuto le Koetliso, le ntse le abela likolo litichere, haholo tse bontšitseng tlhoko ea tsona. Tsena li hlalositsoe ke Mookameli oa Liphatlalatso Lekaleng la Thuto le Koetliso, Molikuo Sekhonyana, puisanong le Koranta ka la 31 Pherekhong monongoaha.

O re litaba tsa tlhokahalo ea litichere likolong tse ling e bile tsa nako e telele, empa hona joale lekala la habo le se le kene morerong oa lihala-hala o laoloang ke Ofisi ea Tona-Kholo moo baithuti ba ingolisang ka mekhahlelo eohle ea bona, hore ba tsebe ho fumantšoa monyetla oa boithuto ba lilemo tse peli.

O bontšitse ba ile ba bolella baokameli bohle ba likolo ba nang le tlhoko ho ithalosa ho latela litlhoko tsa litichere tsa bona le hore motho o hloka litichere tse kae, 'me likolong tsohle tseo baokameli ba tsona ba entseng likopo ba ntse ba thuseha.

O re morero ona o ba thusitse ho kenya letsoho tlhokong e neng e bonahala e le kobo-anela likolong tse 'maloa. O re lekala le bile la etsa kopo ho bangoli ba likolo hore ba hlahlobe likolo moo ho nang le litichere tse ngata, ba bang ba fokoletsoe ho tse se nang litichere.

Ho sa le joalo, Mookameli oa Sekolo sa Mathomo sa Bolula, 'Masalemone Kolofofo, o hlalositse hore sekolong sa habo litichere tse hiriloeng li tharo, ha bohle e le litichere tse tlišoeng ka lihala-hala. O re ba na le khaello 'me e se ka tsona litichere tseo li ka hiroa ho latela tlhoko e sekolong seo. A re ba na le baithuti ba 220, 'me pele ba tlatsetsoa ka litichere tseo, ba ne ba sebetsa ba le bararo.

O bile a thoholetsa lekala

ka mohato ona oo a hlalositse o bile molemo ho baithuti 'moho le ho litichere tse neng li lutse malapeng li sa etse letho. A re e bang 'muso o ka sebelisa leano lena khaello ea litichere e tla ba pale ea maobane.

O re ba imolohile hobane mosebetsi ohle o ne o ba mahetleng a bona, leha ho le joalo, ba ntse ba ikemiselitse ho sebetsa ka thata ho ruta bana, qetellong ba be le bokamoso bo chabileng.

Matšepo Selialia, eo e

leng tichere sekolong sena a bile a fumane monyetla oa ho sebetsa tlasa morero oa 'muso oa lihala-hala, o hlalositse hore ho molemo hore ha ba phethetse lithuto tsa bona ba fuoe monyetla oa ho ruta barutoana, kaha mosebetsi e le qholotso e kholo. A re le hoja ba il'o qala bophelo fatše kamor'a ho phethela tšebetso ea bona ea lilemo tse peli empa ba fumane litsebo.

O re sekolong sena ba fumane ho ruta litichere tse tharo, moo e mong le e

mong a neng a ruta lihlopha tse tharo, e leng ho bakang khatello le ho se rutoe hantle ha barutoana. A re le molao ha o lumele hore tichere e imetsoe ka palo e holimo ea baithuti, kaha ho lumelehile hore bonyane tichere e rute barutoana ba 40. A re e se eka morero ona oa 'muso o ka tsoela batho bohle molemo hobane tlhokahalo ea mosebetsi ho bacha e holimo haholo.

O hlalositse hore ba fihlile sekolong sena ba le ba beli, ba tlatsetsa litichere tse

tharo, 'me tlhoko ea litichere e ne e le tse supileng. O re ntho e bohloko ke hore ka Hlakola monongoaha, ba tla be ba qetela mosebetsi ona, oo ba sa tsebeng na ho tli'o sala ho etsahala eng ka baithuti, kaha ba le bangata ka palo.

H'a phethela o re ba ikopela keketso ea konteraka ea lihala-hala, leha e ba ba sa hiroe molemong oa barutoana, e le hore ba se ba lahle feela khrehloa nakong ena eo ba neng ba se ba hlokomela phetoho.

## Tlhekefetso ea Litichere

### Nthabeleng Seitlheko

**M**ongoli-Kakaretso oa Mokhatlo oa Litichere oa Advanced Union of Lesotho Teachers (AULT), Matlotlo Khomari, o re 'Muso oa Lesotho o tlameha ho ananela ho tlatsetsa likheo tsa mosebetsi likolong e le hore ho theoloe tlhokahalo ea mosebetsi e tobaneng le litichere naha ka bophara. O hlalositse tsena, puisanong le Koranta, ka la 31 Pherekhong monongoaha.

O re boholo ba litichere

li ntse li ea holimo le tlase ka mangolo empa likheo li le teng likolong, hoo qetellong likolo li qetellang li ipatlela litichere tse ikemetseng. O re ha palo e fokola ea litichere likolong seo se etsa hore bana ba se rutoe ka nepo, 'me sephetho sa bona sea ameha. O re 'muso o lokela ho tsoa puo ka khiri ea litichere tse ikemetseng e atileng likolong tse 'maloa.

Khomari o supile ba tšoenyehile ke ketsahalo ena, hobane litichere tse hiroang li ikemetse likolong li seboko ke litlhekefetso tseo ba li etsetsoang ke bahiruo ba bona, hoo ba bang ba fumanang meputso le ho lelekoa nako eohle ha mookameli a rata. O re

maemo ana ke a mang a fokolisang boleng ba thuto kahar'a naha, kaha batho ba ruta barutoana ka lipelo tse bohloko.

Har'a tse ling o bontšitse hore qholotso tse ling ke hore litichere li hlekefetsoa maikutlong ke meputso e sa pheliseng, e tlang ka mekhoha e nyahamisang. A re 'muso o ke o bone hore litichere tse hiriloeng ke likolo tse ikemetseng li ea sireletseha le meputso ea bana ebe e phelisang.

A re ha 'muso o sa tsoe kahar'a liofisi ho ea hlahloba tšebetso ea litichere likolong e ba bothata, 'me thuto e lula e thefuleha hobane ba ikarabellang ba phomotse. A re o nyahlalitse litichere tse sebetsang likolong

tseo e seng tsa 'muso ka ho se ba sireletse khahlanong le bahiri ba bona.

A re ho bohlokoa hore baithuti ba ngole Sehlopha sa Bosupa le hore se phatlalatsoe e le hore litichere tsohle li tsebe ho sebetsa ka thata ho ruta bana, hore boleng ba thuto bo lule bo bolokehile.

H'a phethela o itse Lekala la Thuto le Koetliso le sale morao litaba tsa litichere tse ikemetseng likolong, ho utloahale hore bao ba mosebetsing.

E mong oa litichere tse sebetsang likolong tse ikemetseng, 'Mannete Setala, o supile hore ba tobane le liphephetso tse ngata, hoo batho ba bang ba sebetsang e le baithaopi ba nako e telele ba sa fumane meputso, ba lieha ho fumana meputso, 'me nako e 'ngoe ba e fuoa ka letsoho. O re taba ena e lokela ho phamoleloa holimo e sebetsoe ke lekala le ikarabellang, hobane ba lekile ho kopa namo makhotleng a bosebetsi.

O re ba lumela hore likolo tse ikemetseng li hlalisa mosebetsi kahar'a metse, empa li hlahlojoe hore li se ke tsa iketsetsa borata kahar'a naha, hobane hoo ho lematsa thuto ea Naha ea Lesotho.

Ho sa le joalo, Mookameli oa Liphatlalatso Lekaleng la Thuto le Koetliso Molikuo Sekhonyana, o hlalositse hore ha ho na moo lekala le ka kenang litabeng tse lumellanoeng ke batho ba babeli, ka hona hoo ha se boikarabello ba bona.





# Lihoai li hlaseloa ke komello



**Basali ba sebetsang Mohlakeng Community Garden**

**Nthabeleng Seitlheko**

**S**e seng sa lihoai tse sebeletsang Mohlakeng Community Garden Quthing, 'Malebohang Moeketse, o re ba hula ka lithako tsa morao tlhahisong ea meroho ka lebaka la mohloli oa metsi o chang nakong ena eo lipula li sa neng, ka hona lijalo tsa bona li qetoang ke komello. O boletse tsena, puisanong le koranta ka la 29 Pherekhong monongoa-ha.

O re ba pholoha ha lipula li ka na ka matla kaha mohloli oa bona o bokella metsi, ho feta mona b'a lata sebakeng se hole le bona moo a hlahang e le phophi, hoo mekhoha ea ho tšella e bang boima. A re kaha ba sebetsa ba le 'maloa sebakeng seo, ba ee ba qetelle ba lata metsi nokeng ka likosekara ho tšella leha e se ka matsatsi ohle. O re boemo ba phetoho ea leholimo ke qholotso e kholo, kaha ba sitoa hore ba fumane temo e atlehileng ka lebaka la komello le mocheso o holimo.

O re ha ba e-šo fumane lipeo tse atlehang ho mamella mongobo, ba sebelisa moiteli ho lema, haele ho hlola kokoanyana ba kopanya mefuta eohle ea litlama-tlama b'a li tula ba tšele ka metsing kamor'a matsatsi ba khe ba tšelle. O re pejana mokhoa ona o ne o ba sebeletsa ba atleha ho bolaea likokoanyana lijalong, empa ha joale ba palletsoe. Moeketse o re ba hlaset-

soe ke seseli se jang lijalo ka tlaaše le kokoanyana e ntšo e fihlang e manaka a masehla. O re kaha ba hloka temo e ntlafetseng, ha ba khotlaetsoe ho tšela lichefo kaha li balehisa bareki ebile, ha ba na tsebo ea hore na li tsoa kamor'a nako e kae sejalong.

O re ka lebaka la maemo ana lihoai tse ling tseo ba neng ba ikopantse le tsona li nyahame, ha li sa ea khoe-bong ena. O re ha temo ea bona e atlehile ba boloka lijo ka libotlolong, e le mokhoa oa ho li hleka masimong le ho li bolokela nako e tlang. A re ba se ba ntlafalitse temo hobane ba se ba lemme lifate tsa liapole tse qalileng ho beha ka selemo sa 2023, leha li sa ka tsa atleha le tsa liperekisi tseo ba seng ba rekisitse boholo.

O bontšitse ha chelete eo ba e bokellang polasing ena, ba e boloka hore ha tšehetso e hlahang ho WFP e fela ba tle ba sale le

morero o ntse o phela. O re esale ba qala tšebetso ena ke basali ba atlehang ho boloka chelete, ho etsa temo-khoebo, ho itlhahisetsa lijo malapeng le ho ithuta ho tsamaisa khoebo ka kotlolo-



ho. H'a phethela o itse morerong ona ba sebetsa



likhoeli tse tšeletseng tsa boithaopo, tse tšeletseng tsa ho fumana meputso ea M1,200.00 motho ka mong ho tloha ka selemo sa 2017, 'me ba kopa hore chelete eo e eketsoe. A re mofani ke WFP tlasa morero oa eona oa boitšematlelo le toantšo ea phetoho ea leholimo (AICOV), o khotlaetsang ho boikopanyo ba lihoai nakong ena eo boemo ba phetoho ea leholimo e leng qholotso.

'Malebohang Theko, o hlalositse hore temo e bohlokoa, kaha ba tseba ho ikholla bofumeng le ho phelisa malapa nakong tse thata. O re ba atleha ho hlalisa lijalo malapeng empa bothata ke khaello ea baji e leng se etsang hore lihoai tse ngata li nyahame ho kena temong. O re sebaka sa habo se atleha ho hlalisa rapa e ntle, 'me batho

ba tsebe ho hlahisa lijo malapeng.

E mong oa bahoebi Mahlokoane Maliehe, o re o lula a reka lihlahisoa tsa Basotho hobane ke mohoebi 'me seo a se hlokanang ke hore Basotho ba hlahise lijo tsa boleng, tse ka sebelisoang le ho rekisoa nako e telele kahar'a lebenkele. O re ntle le hore Basotho ba tšehetsane lihlahisoa tsa bona li ke ke tsa ba phelisa. O re khoebisano kahara metse litabeng tsa temo e lokela ho phamoleloa holimo ke batho bohle hore lihoai li tsebe ho phela le ho hlahisa ka bongata.

O re qholotso e 'ngoe ke ea melata e sa ananeleng tlhahiso ea Basotho leha lihlahisoa tseo ba li hlokanang li le teng. O re bao ha ba natsa lipehelo tsa 'muso, hoo ba rekang thepa ea Basotho ka lichelete tse ratoang ke

ba itemela eona malapeng, ebe ha ba tsebe hore na ba e rekisetsa mang.

O re esale a qala temo ea moroho ka selemo sa 2000, o ntse a phelisa lelapa la hae ka eona leha ho le boima ka lebaka la boemo ba phetoho ea leholimo.

O re maemo ana a renang a amme temo hoo batho ba qetellang ba nyahame hobane ha pula e na ka lifefo le likhohola e hohola le lijo masimong. O re leha ho le joalo, kamehla ha pula e ile ea na o bokella metsi ka lekuka a tle a sebelise nakong ea komello. A re e se ka ba lekala ba ka ba tatisa ka lipeo tse mamellang le nakong ea komello, hore

bona. O re Basotho ba ke ke ba hloma tlhahisong ea bona, kaha melata e rerile ho ba nyotobetsa hobane ba na le toro ea ho amoha Basotho matlotlo ohle.

H'a phethela o re melata e tlameha ho khannoa ka chofa ke melao, e ba peletsetse ho reka lihlahisoa tsa Basotho. A re lijo li teng kahar'a naha ba nang le mabenkele ba li reke etsoe e le bona mebaraka ea Basotho. A re leha ho le joalo, komello ke qholotso e kholo ha habo, e etsa hore tlhahiso e amehe empa e bang lithuso li le teng sebakeng sa lihoai, hoo ho ka thusa hore litaba tsena ebe pale ea maobane.






# MOB KIDDS EDUTAINMENT

## Puzzle MOB 92-4520

### Across


- 1. Pasta, maybe
- 9. Summon for service
- 15. Attacked
- 16. Base order
- 17. Canal locale
- 18. Parlor piece
- 19. Miss, eventually?
- 20. First name in objectivism
- 21. Not ahead
- 22. Still
- 25. Foible
- 26. U.S. border protector
- 29. Fund
- 30. It might wake you up
- 33. Agile
- 35. Needle source
- 37. Fed personnel
- 38. One who moves a lot
- 41. Buff relative
- 42. Iota
- 43. One who gets the point
- 44. Put a damper on
- 46. Greensboro Four protest of 1960
- 48. Make out
- 49. Flatter, maybe
- 50. It's hard to hit
- 52. Warehouse platform
- 55. Nice beach season
- 56. Strauss's "\_\_\_ Nacht in Venedig"
- 60. "Calm down"
- 61. Medieval strummer
- 63. Polar bear's domain
- 64. Elbows and such
- 65. Start enjoying
- 66. Showy flowers



### Down

- 1. Scanty
- 2. Bibliophile's suffix
- 3. Merrill of "Butterfield 8"
- 4. Floral swelling
- 5. Set VIP
- 6. Seriously
- 7. Didn't take off
- 8. Unappetizing alternatives, figuratively
- 9. Digs in Durango
- 10. Much-debated blowups
- 11. Showing no restraint
- 12. Fashionable ones, in some circles
- 13. Friendly leader?
- 14. Striking end
- 23. Graphic introduction
- 24. Tease
- 26. Like the title woman of a Gene Wilder film
- 27. Sibling's issue
- 28. Bumptious type
- 31. Actress Zellweger
- 32. Between, in Brest
- 34. Bargain meal
- 36. Dwelling
- 39. Name seen in cold war news
- 40. Adolescent woe
- 45. Cut further, perhaps
- 47. Reddish-brown
- 51. Back in
- 52. High school jr.'s hurdle
- 53. Razor handle?
- 54. Under-the-tree name
- 57. Inflexible
- 58. Endangered state bird
- 59. Crimson rivals
- 62. "As Time Goes By" pianist

### SOLUTION 92-4519



## DID YOU KNOW?


**Earthworms are Very Important for soil ecosystems—in a Good or Bad Way**

- Improved soil structure
- Increased porosity
- Improve aggregation
- Release of nutrients
- Organic matter turnover
- Improved fertility
- Microorganism promotion and dispersal
- Improved O<sub>2</sub> and gas diffusion
- Improved moisture drainage and dispersal
- Breakdown of soil particles
- Addition of high energy water soluble organic compounds
- Soil ingestion, digestion, excretion
- Fragmented soil particle and increased surface area
- Increase water holding capacity

...Some regions of the world have developed without earthworms for over thousands of years. For example, in northern North America, earthworms have been absent for more than 10,000 years and have only been re-introduced over the past ~400 years...

**E**arthworms naturally occur in most terrestrial ecosystems around the globe. They constantly structure the soils that they live in. Their burrowing activities mix the soil and improve the flow of air and water through the underground world. By eating dead organic material from the soil surface, dragging it down into the soil, digesting it, and then leaving their droppings, they redistribute nutrients throughout the soil. These activities affect other life below and above the ground. The altered air, water, and nutrient availability changes how other organisms can use their resources, where they can live, and how well they can grow and reproduce. Through these activities, earthworms influence bacteria, fungi, springtails, mites, beetles, plants, and even animals that live above the soil surface, such as aphids. Consequently, earthworms are very important soil organisms with impacts beyond the belowground world. This is fine in areas where the other organisms are used to having earthworms around, but it can become problematic where they are not used to these squishy neighbors.





# TSA KEREKE

## Thapelo ea Mopapa ho bakuli

**Staff**

**N**tate ea Halalelang o phatlalalitse morero oa thapelo ea hae sebakeng sa khoeli ena ea Hlakola monongoaha, 'me o mema bohle ho rapella ba kulang haholo 'moho le malapa a bona.

Tsena tsohle u li entsa ka The Pope Video e hlahang ka ho Pope's Worldwide Prayer Network. 'Video' ea khoeli ena e tla nakong eo Kereke e ketekang sehopotso sa Mofumahali oa Lourdes ka la 11 Hlakola e leng letsatsi leo ho ketekoang Letsatsi la Lefat'se la Bakuli. Mopapa o hlalosa hore hangata batho ha ba bua ka

tšo tse bontšang mae-mo ohle moo ho hloka-halang lerato le bonolo bathong ba kulang haholo, moo maemong a lumellang ba ka fumanang pheko empa taba-kholo ke hore ba bontšoe lerato le tsotello. O bontša hore le haeba motho ho bonahala eka menyetla ea hore a phekolohe e fokola, "o lokeloa ke ho fuoa litlhare, ho alafshoa ke llong le moeeng le ho fumana tataiso ea motho." O tsoelapele ho re pholo ha se ntho e ka etsahalang kamehla empa bohle re ka hlokomela le ho rata motho ea kulang.

H'a bua ka tlhokomelo e fuoang batho ba nang le bokuli bo kang ba mofetše kapa lefu la pelo, o re e pakahatsa hore mokuli eo h'a fuoe

halang ekaba tsa nama, moea kapa tšehetso e tsoang sechabeng. O qetella ka ho kopa lithapelo le boitelo ho tsoa ho bohle e le hore batho ba kulang haholo, 'moho le malapa a bona ba fumane tlhokomelo e lokelang ea litlhare 'moho le ea tataiso ea motho.

The Pope Video ke morero o reretsoeng ho phatlalatsa lithapelo tsa khoeli mabapi le thapelo e etsoang ke Morena Papa, 'me e etsoa ke Pope's Worldwide Prayer Network (Apostleship of Prayer). Ho tloha ka selemo sa 2016 e shebeletsoe ke batho ba fetang limillione tse 200 marang-rang ohle a Vatican. E fetoletsoe lipuong tse 23 eaba e fumane phatlalatso linaheng tse



batho ba kulang haholo hangata ba kopanya mantsoe a mabeli a sa tšoaneng e le 'ho pheko-leha' le 'ho se pheko-lehe.'

O bua mantsoe a Mopapa John Paul II a re'ng "Pholiso haeba maemo a lumela, empa kamehla u bonts'e tsotello." 'Video' ea hae e hlahisa litšoan-

feela tlhokomelo ea litlhare empa katamelo ea batho ho eena e fana ka mofuthu. O re malapa ohle a fetang tlasa maemo ana ha ba lokela ho tlohela ba le bang, bakriste ba bontš'e tšehetso ho bona. Batho ba lelapa ba lokela ho etsa qeto ea ho fana ka litlhoko tsohle tse hloka-

114. Pope's Worldwide Prayer Network ke morero oa Vatican o reretsoeng ho thusa Makatholiki ka thapelo mabapi le liqholotso tsa letsatsi le letsatsi, le ho ntšetsapele mosebetsi oa Kereke.

**Vatican News**

## 2023-2024 SELEMO B

### Sontaha sa 5 har'a selemo

**Jobo 7,1-4,6-7**

**Pesalema 146**

**Ba-Korin 9,16-19.22-23-35**

**Mareka 1,29-39**



### Khothatso

#### Ho tšepahala bosebeletsing ba Morena

Lipalo tsa kajeno li bontša ka moo botho hangata bo etsang hore batho ba sitoe ho latela litlhoko tsa moea tse jereng limisteri tsa Morena Molimo.

Mohlala o motle o fumaneha Thutong ea Pele ho tsoa Bukeng ea Jobo. Ha re sheba Buka ena hantle moea oa Jobo o shebahala o ferekane tjena. Neng-neng o tsepame holima tsohle tsa leholimo ebe kamor'a motsotsoana o boetse o khutletse menateng ea lefatše. Ntho e neng e mo sitisa ho tsitsa ke hobane o ne a potapotiloe ke batho bao e seng balumeli, ka hona ba ne ba iphetola maqhubu a leoatlle ho eena.

Nakong eo a neng a phela ho latela litaelo tsa Morena, a furaletse bobehle (Jobo 1:1) o ne a e-na le bara ba supileng le barali ba bararo (Jobo 1:2), linku tse 7000, likamele tse 3000, lipholo tse 500, liesele tse 500 le basebetsi ba bangata hoo e neng e le e mong oa baruti ba Bochabela. (Jobo 1:3) Nakong ena eaba Morena Molimo le Satane ba ba le puisano 'me Satane a re Jobo o tšepahalla Morena hobane ha e-s'o amohela letho le bohloko ho tsoa ho eena. Ka hona mohla a ka le fumanang o tla rohaka lebitso la hae hang. Eaba Morena o fa Satane matla holima Jobo ho etsa ka moo a ratang ka teng. (Jobo 1:12)

Kamor'a nako e seng kae Jobo a lahlahela ke tsohle tseo a neng a e-na le tsona, empa ha ka a fetohela Morena Molimo oa hae. Eaba Satane o re Morena a ame masapo le nama ea hae o tla rohaka lebitso la hae. (Jobo 2:5) Morena a boela a fa Satane matla 'me eena a otlala Jobo ka liso ho tloha hloohong ho isa maotong. (Jobo 2:7). Bohle ba neng ba tseba Jobo ba qalella ho ba baahloli ba litaba tsa moea. Ba bang ba re o entse libe ka hona a li bakele. E mong eena a re molato oa hae o lokeloa ke kotlo. Le mosali oa hae a re Jobo a rohake Morena e le hore a tsebe ho shoa (Jobo 2:9). Empa a fetola ka hore "Ana re lokela ho amohela tse monate feela ho Morena e se tse bohloko?" (Jobo 1:10)

Thutong ea Bobeli Paulosi ho utloahala a ne a tšepahalla bosebeletsing ba Morena. O ile a inka e le lekhoba le kolotang Kriste ea le pholosit-seng ka lebaka la grasía ea Morena. O ne a sa ikhantš'e hobane a ne a khethiloe ho phatlalatsa Molaetsa o Molemo, empa joaloka Mokriste ea tsoetsoeng la bobeli o na lokela ho ruta e le ho arabela pitso ea Morena ea ho tsamaea tumelong e phelang ea Kriste. Mohlomong o ne a tseba moputso o emetseng bohle ba phehelletseng tumelong ea bona ho Kriste Jesu.

Paulosi o ne a tšoantš'a mosebetsi oa hae le oa moemeli oa naha eo thahasello ea hae e leng ho phetha tsohle tse amanang le thomo ea hae, e le hore qetellong a tle a fane ka tlaleho ho ea mo romileng. E le ho phetha thomo ena o ile a hana tefo sebakeng sa mosebetsi e le hore a tsebe ho fumane moputso leholimong.

Evangeling Kriste o ile a tsoelapele ho sebeletsa Morena ka ho ruta bohle hore 'Muso oa hae oa tla lefatšeng. O entsa tsena ka ho etsa mehlolo e mengata le ho folisa batho, joalokaha a folisitse mohohali oa Simone. Eo eitseng hang ho ba a folisoa e ama a ba sebeletsa, sena se bontš'a hore bohle ba tsoetsoeng la bobeli ba lokela ho amohela bosebeletsing ba Morena.

Re ithutile kajeno hore leha ho ka ba thata joang bophelong ka matla a Moea o Halalelang re ka hlola tsohle ka grasía ea Morena Molimo. Re boetse re lokela ho ipeha haufi le batho ba nahanang litaba tsa moea hobane ba lefatš'e ba tla re khelosa. Re lokela ho sebeletsa Morena Jesu e le teboho ea Sakramente ea Tlhatsuo e re entseng bana ba Morena. Re fuoe feela le rona re fane feela re sa lebella moputso oa lefatš'e lena.

## Bahalaleli har'a Beke

- 5 Hlakola Agatha
- 6 Hlakola Paul Miki
- 7 Hlakola Moses
- 8 Hlakola Dionysius
- 9 Hlakola Apollonia
- 10 Hlakola Scholastica



Tšelisothakholi

# Katleho ea LBA

**Mokhatlo oa Lesotho oa Papali ea Basketball o ile oa tsoara litlholisano tsa bahlankana le baroetsana ba lilemo li ka tlaase ho 23, tse bitsoang LBA Ladies Back to School Basketball Tournament, e le emeng ea mekhoha ea ho akofisa le ho kenya letsoho kholong ea papali ea Basketball le ho itokisetša lipapali tsa liki ea basali. Lipapali tse na li ne li tsoaretsoe Ha Ratjomose, Maseru ka la 27 Pherekhong 2024.**

Mokhahlelong oa baroetsana sehlopha sa U23 sa boemo bo holimo papaling ea Basketball sa Lerotholi Polytechnic(LP), se ile sa ikhaphela maemo a pele, 'me ba kiba-kiba ka chelete e kaalo ka M1,260.00. Haele ka ho bahlankana,

sehlopha se ntseng se thuthuha papaling ena sa Sharks se ile sa arolelana moputso le sa LP, ka ho hlaha maemong a pele 'me tsa fumana moputso oa M630.00 sehlopha ka seng.

Puisanong le mohlophisi oa litlholisano tse na e bile e le Mookameli oa Basali Papaling ea

Basketball, Mofumahali Tšepiso Motloi o boletse hore morero oa lipapali tse na o mekhahlehlo e 'maloa, 'me oa pele ke ho keteka le baithuti e le sesupo sa hore likolo li se li butsoe, ka hona ba lokela ho itahlela ka setotsoana mosebetsing oa sekolo le papaling ea Basketball likolong tseo ba leng

ho tsona. A re morero oa bobeli ke boitokiso ho lihlopha e le hore ha liki e qala ba be ba le mala-a-laotsoe.

A re morero o mong o moholo oa litlholisano tse na, ke ho bona hore lipapali tse teng tsa basali tsa papali ea Basketball na li kae, e le ho bona hore na ba tlii'o eketsa

lenane joang la lihlopha tsa basali tse kahare ho naha, e le hore ha li qala liki ea tsona li tle li be le palo e phahameng haholo ea basali. A hlalosa hore o khotsofetse haholo ke litlholisano tse na, kaha lenane la lihlopha tsa basali le bonahala le eketsehile monongoaha, papisong le ngoahola moo ho neng ho ngolisitse feela lihlopha tse 'ne boemong ba Lihlopha tse Kholo tsa Likolo(Senior Teams).

"Hona ke sesupo sa hore ntho eo ke neng ke iphetse eona ea hore ke tle ke bone lihlopha tse ngata tse ncha, e le hore re tle re tsebe ho ba le lihlopha tse ngata tse batlang li se li phahame tsa basali e se e ntse e etsahala. Taba e setseng e se e le hore re bone hore na re bopa lihlopha joang tse tlang ho bapala boemong ba lihlopha tsa Senior League. Tebello ke hore li e ketsehe ho ba selemong se fetileng li ne li le 'ne feela." Ke Tšepiso eo.



# Lipapali tsa Senuka li fihla pheletsong

Tšelisothakholi

**Mokhahlelo oa pele oa Liki ea Lipapali tsa Senuka tse arotsoeng ka litikoloho tsa Boroa le Leboea kahar'a Setereke sa Maseru o fihlile pheletsong, mabaleng a fapakaneng kahar'a naha, ka la 28 Pherekhong monongoaha.**

Puisanong le Raliphatlalato oa Senuka, Monghali Nazar Surtie o itse papali ena e hola ka mokhoa o potlakileng haholo kahar'a naha, le hoja qholotso e kholo e le mabala le ho hloka tšehetso ho tsoa ho bahoebi. A kopa bahoebi ho e tšehetsa e le hore e tsebe ho

hola ho feta mona. A re e boetse e'a ratoa le ho hlompheha haholo, kaha ba bang ba nka hore ha e bapalloa matlong a thitelo ke hobane bohle ba sebelisa mothamahane empa ha ho joalo.

A re kaha ho e-na le lihlopha tsa bacha, ba etsa ka matla ho bona hore ha ba qetelle ba noa joala, empa ba tsepamisa maitutlo le likelello tsa bona holima papali. A tsoela pele hore se mo thabisitseng ke kholo e teng, 'me o na le tšepo ea hore ha mokhahlelo oa bobeli o qala ka la 18 Hlakola 2024 papali e tlii'o phahama haholo.

A qetella ka hore ha mokhahlelo oa bobeli o qala, o lumela hore lipho-so tseo e bang ba ne ba e-na le tsona ba tla be ba li lokisitse. A leboha bohle ba kentseng letsoho ho holisa le ho atlehisapapali ea Senuka. A kopa bohle ho tsoarana ka matsoho, ho ba ntho



e le 'ngoe ho matlafatsa papali ena.

Lipapali tse na li phethela mokhahlelo oa tsona oa pele, e le ha Sekoele e le maemong a pele Lokong ea 'First Division' ka lipapali tse 17 ea hlola tse 16 e na le lintlha tse

57. Bobeling ke MCP ka lipapali tse 17 ea hlola lipapali tse 13 e na le lintlha tse 49. Sehlopha sa ho qetela lokong ke Fast Kill e hlotseng lipapali tse 'ne feela e na le lintlha tse 15. Athe mokhahlelong oa 'Second Division' e ka

holimo ke HFS ka lipapali tse 13 ea hlola tse 11 e na le lintlha tse 37, bobeling ke Cool Side ka lipapali tse 13 ea hlola tse robong ea bokeletsa lintlha-kholo tse 35. Ka mohatleng oa loko ke Club House ka lintlha tse 11.



# Rabale o ikoetlisa le Villarreal

Tšeliso Thakholi

**M**oetapele oa Sehlopha sa Naha sa Bolo ea Maoto ea Basali sa Mehalalitoe, e bile e le sebakali sa Mamelodi Sundowns Ladies, Boitumelo 'Queen' Rabale o har'a libapali tse tharo tsa Liki ea Basali ea Hollywoodbets, Naheng ea Afrika Boroa tse kaletseng nonyana-tšepe ho leba Spain ka Moqebelo la 27 Pherekhong monongoaha, ho ea ikoetlisa le Sehlopha sa Basali sa Villarreal e le morero oa kopanelo lipakeng tsa Liki ea Hollywoodbets le ea LaLiga.

Libapali tseo a tsamaileng le tsona ke Nomphumelelo Nyandeni oa TS Galaxy Queens

ea ileng a ikhapela khau ea ho ba sebakali se senyenyane ka ho fetisisa Liking ea Hollywoodbets, Nthabiseng Mayiya oa Richmond United le Katlego Moletsane oa Royal AM. Bone bona bo tla boela bo fumana monyetla oa ho boha papali e kholo e lipakeng tsa Villarreal le Cadiz.

Rabale nakong eo a ntseng a le Naheng ea Spain o tla tsoelapele ho ikoetlisa le sehlopha sa basali sa Villarreal, ho fihlela a khutlile, kaha sehlopha seo se tsoile letšolo ho mema libapali tse ipabotseng lefatšeng ka bophara, ho tla li fa monyetla oa ho koetla le tsona, ka morero oa ho thakelana ka malebela papaling ea bolo ea maoto.

Leeto la 'Queen' Rabale la ho ea Spain le tlahoa ke Mokhatlo o Moholo o Tsamaisang Bolo Leso-

tho (LeFA), e le moputso oa ho mo tlotla kamor'a ho khethoa e le sebakali sa selemo ka 2022, Liking ea Basali ea Hollywoodbets, moo a ileng a itšupa hore o na le boiphihlelo papaling ea bolo ea

maoto, ka ho hlaba lintlha tse 23.

Rabele o tlahoa a atlehile ho sireletsa khau ena ea hae ea ho ba mohlabalintlha selemong se fetileng sa lipapali, a boela a hapa khau ea Holly-

woodbets Super League ea ho ba sebakali sa selemo nako ea lilemo tse peli tse latellanang. Ka lebaka la ho ipabola o ile a boela a fua khau ke Mokhatlo oa Afrika oa Bolo(CAF).



# Mokoetlisi o Ila ka mokhathala

Tšeliso Thakholi

**M**okoetlisi oa Sehlopha sa Bantu, Bob Mafoso o ilile ka ho hloka matla le matšoao a mokhathala ho bang ba libapali tsa hae, ba bonahetseng ba e-na le ona papaling ea bona le Limkok-

**wing University(LU), kamora hore Bantu e tsoe ka lesoba la nale ka ho hapa papali ena ka 1-0, Lebaleng la Ha Ratjomose, Maseru ka Moqebelo oa la 27 Pherekhong 2024.**

Mafoso o itse leha a khotsofetse haholo ha ba sa hloloa, libapali tsa hae li bonahetse li se na matla ha-

holo-holo tse kang Litšepe marabe, Thabo Matšoele le Thabo Lesaoana. "Ke mona moo re ileng ra etsa phetoho ra kenya Tšeliso Botsane, 'me metsotsong e mehlano phetoho ea eba teng a ba re hlabela ntlha. Empa mokhathala oa eba teng ra boela ra qala qalong hape." O boletse joalo a bile a eketsa ka hore boholo ba

libapali ba ne ba ile ba otloa ke mokhathala.

"Mats'oele ho'a utloahala o bapetse lipapali tsohle ho tloha ka Pulungoana, o ne a kena papaling e 'ngoe le e 'ngoe ea rona." O boletse joalo. E le ho leka ho loantša boemo bona ba mokhathala, o itse ba tekenne libapali tse hlano, tse ncha tseo e tla 'ne e re ha ho bonahala mokhathala o le teng, ba thuse sehlopha ho se fa matla.

A phethela ka hore haele lintlhang tse ling tse kang tsa ho bapala bolo, ho e boloka le ho e neheletsana ka makhethe, teng ba bapetse hantle le hoja qholotso e kholo e ne e le lebala le mohloa o tsoara bolo hore e se ke ea tsamaea kapele ka moo ba neng ba hloka hore e tsamae ka teng.

Haele mokoetlisi oa Limkokwing, Ntlaloe Ntlaloe o itse boholo ba papali eo ba e bapetseng, moralo e ne e le hore ba ba emele, ba tšelele ka halofong ea bona, ebe ba koala likoti tseo Bantu e ka li sebelisang ho ba hlasela. "Empa ka bomalimabe ha ea ka ea tsamaea ka tsela

eo re neng re lumellane ka eona, haholo nakong eo re ba hlaselang."A rialo.

A re ke ka lebaka lena ba ileng ba qetella ba hlabiloeloe ntlha e bohloko ea 1-0. A re ntho e 'ngoe e ileng ea boela ea ba lobokanya ke ha sebakali sa bona se fua karete e khubelu, nakong eo ba neng ba batlala ba tsoere morethetho, kaha ho ne ho se ho e-na le sekheo se sehlo ka mpeng ea lebala. "Ke eona e neng e sitisa hore re be le lipalo tse lekaneng nakong eo re batlang ho ea pele. Ke lona lebaka le entseng hore re qetelle re lahlehetsoe ke papali eo."

A qetella ka hore ba ngolisitse libapali tse hlano tse tliilo ba thusa ho matlafatsa sehlopha mokhahlelong ona oa ho qetela oa Liki e Kholo. A tiisa hore ka libapali tsena tse ncha sehlopha se tliilo matlafala haholo. Lihlopha ka bobeli li bapetse lipapali tse tharo moo Limkokwing e bapetseng ka ho lekana ho tse peli ea lahleloa ke e le 'ngoe. Athe Bantu eona e hapile tse peli ea lahleloa ke e le 'ngoe.





# SLB e ntlafatsa likhoebo

## Nthabeleng Seitlheko

**B**anka ea Standard Lesotho, tlasa morero oa eona oa ho holi-sa le ho matlafatsa likhoebo tsa Basotho o bitsoang 'Scaled-up Pitching Den,' e ile ea hlophisa sethala sa bahoebi ba Basotho ba nt-seng ba le mafolo-folo likhoebong tsa bona tse fapaneng ho li bapatsa le ho li tsebahatsa, e le ho hloaea mohoebi a le mong ea tlang ho emela Naha ea Lesotho litholisanong tsa khoebo tsa Africa Business Banking Awards, tse il'o tsoareloa Naheng ea Kenya ka 'Mesa monongoaha. Sethala sena se bile Avani Maseru, ka la 30 Pherekhong monongoaha.

Mothehi le Motsamaisi oa Sekolo sa pele sa mofuta oa sona se bitsoang Mamello Special Needs Centre, Mofumahali Kefuoe Nkuatsana a ileng a hlaha boemong ba pele, ke eena ea tlang ho emela Lesotho Naheng ea Kenya. O bile a fua bokhothokhotho ba chelete e kaalo ka M40,000.00. Athe ba ileng ba hlaha boemong ba bobeli le ba boraro ka tatellano ke Setelekoane Tšehlahali oa STKTM Solutions ea ileng a fua M10,000.00 le Pheello Masia oa Masia Investments oa litaba tsa temo ea ileng a fua M5,000.00.

H'a koala ka molao lit'se-beletso tsena le ho lebohela mohloli le bahoebi bohle bao a neng a qothisana lehlokoa le bona, Hlooho ea Lefapha la Khoebo la Banka ea Standard Lesotho, Monghali Malatola Phothane o itse Banka ea Lesotho ka litaba tsa khoebo le libanka tse ling, e ikitlaellelitse ho fetola menyetla eohle ea bahoebi ba Basotho tikolohong ea Afrika hore e be ea bona. "Lesotho ke lehae la rona 'me re lokela ho tsamaisana kholo ea moruo oa lona le rona." A rialo.

A hlokomelisa bohle ba neng ba hloisana hore ba ba bacha sethaleng sena, kaha ba itahletse ka setotsoa khoebong, ka tšebelisa-no 'moho e mofuthu le Banka ea Standard Lesotho. A

lebohela mohloli le ho laka-letsa bahoebi bohle katleho le mahlohonolo.

Mohloli Nkuatsana o ite-bohetse haholo le ho ikutloa a le motlotlo haholo ka seo

a se fumaneng. A leboha Standard Lesotho Bank ka tšehetso eo ba e fumaneng. A tšepisa ho tlela Lesotho le Basotho tlhoho.

Ke bahoebi ba robeli ba

tšehelitsoeng le ho tataisoa ke Standard Lesotho Bank, ba likhoebo tse kang Sus-Tech, Masia Investment, Sum Adventure, Bits and Boards Interiors, Mamello

Special Need Centre, ST-KTM Solutions, MILCO la ATA Trading ba neng ba ketsetse litholisanano tsena ho hlaha likhoebong tse fapaneng kahar'a naha.

## HERITAGE INC e tsosolosa bahoebi

### Nthabeleng Seitlheko

**E**le karolo ea ho matlafatsa boikemelo le ntlafatso ea moruo kahar'a litereke, Kamphani ea Heritage Inc, e tsosolositse likopano tsa bahoebi le sechaba setereke ka seng, ka ho ba rupela ka mokhoa oa khoebisano, poloko ea

le bahoebi ba litereke, 'me sena se etsa hore ho be le khokahano e atlehileng ea ho tsebana ha bahoebi.

Pokane o re maikemisetso a bona ke ho rata ho utloa setumo sa setereke ka seng, le hore se tsebahala ka eng e ka lulang e khahla mahlo a batho le bahahlauli nako eohle. O re ke nako ea hore Basotho ba tsebane ka

re mosebetsi ona o t'l'o thusa ho phahamisa moruo oa litereke, hobane khoebo e tla fetoha nehelatsano kahar'a setereke.

O re sechaba se lokela ho nka boikarabello ba ho kenyeletsa litaba tsa bohahlauli boqaping ba bona hore bahahlauli ha ba feta sebakeng se joalo ho be le tseo ba ka li fumanang. O re

sechabeng e ka matlafatsa moruo oa litereke, le ho kopanya sechaba. A re ba matleng ba lokela ho hatoha litaba tsa theolelo ea matla sechabeng, kaha e tla ba pula-maliboho ea mesebetsi le moruo. O re ho tloha ba qalile mosebetsi ona o sebelisa leano la kopano ke matla, 'me ke bahoebi ba bangata ba seng ba se-



libuka le ho theha likhoebo. Tsena li boletsoe ke Mookameli oa Kamphani ena, Pokane Tsietsi, puisanong le Koranta, ka la 31 Pherekhong monongoaha.

O re morero ona o neng o qale ka selemo sa 2017 oa emisa ka selemo sa 2019, ka lebaka la seoa sa COVID-19, o boea sekoale hobane ba shebile botseteli bo matla likhoebong tsa Basotho, tlhahiso le neheletsano ea lits'ebetso har'a tse ling. O re seo ba se etsang ke ho ts'oara lipitso le sechaba ka ts'ebeliso 'moho

bohlahisi ba bona, ba reke lihlahisoa tse hlahisoang ke bahoebi kahara litereke. O re e bang Basotho ba ka tsetela ka matla litabeng tsena, natlafatso ea khoebo e ka ba bosesenyane ba khoele.

O bonts'itse ha mosebetsi ona o tla thakhoha ka la robong ho isa la 10 Hlakola monongoaha, Setereke sa Berea, 'me ba tla potoloha le naha ho fana ka lithuto, ho tloha ka bana ba lilemo li 10 ho ea holimo hore ba tsebe ho hola ba e-na le lerato la khoebo. O

mohoebi e mong le e mong o buletsoe monyako, kaha e le mokhoa oa ho kenya moea oa khoebo kahar'a sechaba hore ba ntseeng ba thuthuha ba qetelle ba matlafatse ba sa nyahamele khoebo.

Monna enoa oa mohoebi oa Mosotho, o bonts'itse katlehisano eohle ea mosebetsi ona a e etsa ka lichelete tsa hae le ho kopa ts'ehetso likhoebong tse kholo, ha bahoebi bohle ba tla kena mahala 'mokeng ona.

Har'a litaba tse ling o supile hore theolelo ea matla

belisana 'moho e le Basotho kamor'a hore ba ts'oare limmoka tsena.

H'a phethela o re Basotho ba shebe litaba tsa khoebo ka leihlo le ntlafatso, le ho sebelisa tsohle tseo ba nang le tsona ho iphelisa, ba tsebe khoebong ba ka kena melata e kene kapa e sa kena. A re mesebetsi e mehola eo ba etsang likopanong tseo ba li ts'oarang ke ho boqapi ba 'mino, lihlahisoa le khoebo. Batho ba bohlokoa litabeng tsena, ke litsebi tsa tataiso ea khoebo, BEDCO, le libanka.



# ETL le VCL li fana ka matsatsi a mohau



Mookameli oa Liphatlalatsa Econet Puleng 'Mathabo Masoabi.

## Nthabeleng Seithheko

L ikamphani tsa Mehala le Marang-rang Econet le Vodacom li supa ha batho bohle ba sa ngolisang likarete tsa bona ba fuoe mohau oa ho li ngolisa nakong ea matsatsi a 90, e bang moji oa litšebeliso tsa bona a sa etse seo, karete ea hae e tla hlakoloa sesiung sa tse teng le ho koaloa, e rekisoe bocha. Tsena li tiisitsoe ke Mookameli oa Liphatlalatsa Econet, Puleng 'Mathabo Masoabi, puisanong le Koranta ka la 31 Pherekhong monongoaha.

O re baji ba litšebeliso tsa bona ba ile ba fuoa sele-

mo hore ba ngolise likarete tsa bona, hoo ho bileng hoa eketsoa nako e 'ngoe empa ho ntse ho na le likoekoe tsa morao tse filoeng nako ea mohau, kamor'a hore LCA e ntše phatlalatsa ea ho koaloa ha ngoliso ea likarete ka la 31 Pherekhong monongoaha. O re tselo ke hore likarete tshole tse sa ngolisoang ho tloha, ka la 1 Hlakola 2024, li se ke tsa fumana litšebeliso life kapa life ha li ntse li tsoere marang-rang, ka hoo motho ea joalo o lokela ho ea ngolisa karete ea hae.

Masoabi o re Econet e atlehile ho ngolisa 97% ea baji ba bona, 'me ba saletseng morao ba iponahatse kaha ba tla sosobanya lifahleho

ha nako e ntse e tsamaea ho latela khatello ea molao o ba tsamaisang.

Mookameli oa Vodacom Tšepo Ntaopane, polelong ea hae o hlalositse hore LCA e fane ka taelo ea hore ka la 31 Pherekhong 2024, ho koaloe ngoliso ea likarete empa leha ho le joalo, baji ba filoe matsatsi a mohau, ha ba ntse ba amohiloe monyetla oa ho fumana litšebeliso life kapa life tsa bona, ho fihlela ba ingolisitse.

O re beng ba likarete tse sa ngolisoang ba nkoa ba sa ikobele molao oa ho ngolisa likarete, 'me ha li khoeli tse tharo li feta, likarete tse joalo li tla hlakoloa sesiung sa bona le ho rekisetsoa batho

ba bang. A re ntho e bohloko ke hore ho basebelisi ba koalloa litšebeliso hoo ho tla ama lekhetho le liphaelo, ntlafatso ea khokelo ea marang-rang le mesebetsi eo ba e etsang ka pokello ea chelete e thusang sechaba.

A bontša ha tiehiso ea ngoliso ea likarete tse ling e bakiloe ke batho ba lahlileng likarete tsa boitsebiso kapa ba se nang tsona ho hang, le bothata ba libaka tse ling tse sa fihleleheng ha bonolo tse hole le litšebeliso. A re batho ba bang ha ba ngolise likarete ka le reng ho t'ona kena-kenanoa le poloheho ea bona, 'me ba se ba ngolisitse likarete tse 1.41 milione.



Mookameli oa Vodacom Lesotho Tšepo Ntaopane.

# IEC e tlama thoto

## Nthabeleng Seithheko

S etsi se ike-metseng sa likhetho (IEC) se tlama thoto e leba motseng o mocha Masru West, e nyahlatsa moaho oa khamphani ea MGC eo monga eona e leng Tona-kholo Samuel Ntsokoane Matekane eseng e le mopolotiki, e furalla moaho ona e le ho baleha letsuka la hore IEC e laoloa ke eo le ho loanela boikemelo ba eona. Tsena li hlalositsoe ke Raliphatlalatsa oa IEC, Lesole Mohlomi, puisanong le koranta ena, ka la 1 Hlakola monongoaha.

O re IEC e qala mosebetsi ona ka la 1 Hlakola 2024 ho fihlela 1 'Mesa 2024, moo qetellong IEC e keneng

lipuisanong ea ho reka moaho oo o e le o batlang ho sebeletsa ho ona oa moshoelella, 'me ho fihlela hona joale ba sallane le ho tekanela tumellano ea thek-isetsano le monga moaho le hore bahlahlobi ba meaho ba eo hlahloba hore na e fela moaho o lumellana le boleng ba chelete e neng e kopiloe ke monga ona e leng 95million. O re hang ha ba phethetse ho tla tekaneloa tumellano le monga moaho.

Motsamaisi oa Likhetho IEC, Advocate Mphaipele Maqutu, o supile hore ba rata hore IEC e be le sebak sa eona sa tšebetso e seng e lule e qhomaka. A re e le komisi ba qalile ho tso-ma IEC le hae tloha 2014, ba ntse ba sokola empa ba tlo pholoha kaha ba bile le

lipuisano le monga moaho.

O bontšitse Lekala la lichelete le Meralo le ile la ba thusa ho tla ka tokomane eo batlang ho batla sebaka sa bolulo ka eona, 'me hoa behelloa 241million ka thoko e le ea moaho empa kamora lipuisano le monga moaho oo ba tlang ho sebeletsa ho ona hona joale, ba fumane hore batlo boloka chelete e ngata e tla thusa lintlafat-song tsa naha. O re taba ena e neng e se e ba behile tlasa khatello ba atlehile ho phunyeletsa, kahoo Basotho ba tsebe setsi se fallela Maseru West.

Ba thabile hore ba tla tsoelapele ka boikarabello ba bona letsatsi le letsatsi joaloka ngoliso ea bakhethi hore ba lule ba ntse ba sebetse. O re ba sheba bapopolotiki ka leihlo le tšoanang la

li tona-kholo ha ba ea lokela ho ea ka tšobotsi. A re lekala la mesebetsi e meholo le sechaba le ile ea ea hlahloba hore sebaka seo hore na seka amohela batho ka poloheho.

Ba lokela ho buisana le bapopolotiki hobane ke 'muso o emetseng ho kena litulong, ha ba sa tsebe moo ba eo sebeletsa teng, ba bile moahong ona nako ea lilemo tse 10, ba tlo ntša thepa le tshole le tokiso e lokela ho tla etsoa moahong oo. A re bana le nako e khutšoanyane le khatello, o nahana hore maemong ana ba tla fihlela lintho tshole tseo ba hlokang ho li feta.

H'a phethela o hlalositse hore moaho o boemong ba ho amohela batho bohle ba lipolotiki, O re IEC e lokela ho kenya letsoho tokisong ea moaho ona kaha ba abeloa chelete ke 'muso, are ho ntse hona le thepa eo ba tla

e lokisa moo ba ke ntseng thepa ea tšebetso joaloka li camera, ho tla ba le baikitse sebakeng sa mosebetsi leha e le hore monga moaho o ntse a lokisa ho latela litumellano tsa bona.

Puisanong le Moetapele oa Lekhotla la BDC, Molibeli Soro, o supile hore seo ba se hlokang ke hore IEC e tsoe moahong oa mopolotiki, e seke ea hapuo hobane ke setsi se ikemetseng sa likhetho, se lebeletsoeng ho sebetse litaba tsa likhetho ka 'nete eohle, ntle ho tšekamelolo. A re ha IEC e ne e ka tsitsa moahong oo e ne e tla amahangoa le lipolotiki 'me Basotho ba ne ba tla hloka tšepo ho eona.

O re ba hloka lipolotiki tsa khotso, tse ananelang batho bohle tse senang leihlo la khethollo, bat habile hore IEC etsoa meahong eo kaha seo se tla tlisa khotso ho Basotho.



# LNAPARD e'a itsebahatsa



## Nthabeleng Seitlheko

**M**ookameli oa Mokhatlo oa batho ba nang le Bokooa ba Masapo (LNAPARD), Molise Foso, o re ba tsoile letšo-

lo ho itsebahatsa kahar'a batho ba nang le bokooa ba masapo le ho ba thakela ka malebela litabeng tsa Litokelo tsa Mantlha tsa Botho. Tsena o li boleletse Koranta ka la 1 Hlakola monongoaha.

O re ba hlokometse hore batho ba nang le bokooa

ba masapo ha ba utloisise litokelo tsa bona ha ba bang ba se na tsebo ho hang, 'me khaello e kholo e etsa hore le liqetong tse kholo ba sal-le morao. O re ba t'lo tsoara lithupelo kahar'a sechaba ho se thusa ho utloisisa litaba tsa batho ba nang le bokooa haholo ba masapo.

Foso o re batho ba nang le bokooa ba na le litokelo joaloka batho bohle, 'me seo se re le bona ba tlameha ho ba le boikemelo le meeli. A re ho phethahatsa sena ba tla potoloha le likolo tsa batho ba nang le bokooa, 'me ke leeto leo ba seng ba le thakhotse kaha qetellong ba rata ho bona ba e-na le boitšepo ka litse-la tsohle.

Har'a litaba tsa bona o re ba rupela batho ba nang le bokooa ka mekhoa ea ho ipuella, ho ba le boikemelo le ho hlalohanya moo litokelo tsa bona li hatiketsoeng. A re ba tsebe le hore mokhatlo ke 'muelli oa bona ka hona ba nke karolo ho ona, hobane o tla ba thusa linthong tse ngata.

H'a tsoelapele o re ba t'lo sebetsana le hore na

ba thusa joang litabeng tsa baitjaro e le hore ba iqal-le mekhoa ea boipheliso le ho utloisisa tsamaiso ea likhoebo, kaha ba lumela hore bophelo ba bona bo tla fetoha. O re bokooa ba masapo ha bo setise motho ho etsa letho, motho a ka etsa mesebetsi eohle e etsoang ke batho kaha e se bokulo.

A re ba lokela ho itsebahatsa e le mokhatlo, batho ba tsebe ka bona le ho utloisisa tšebetso ea mokhatlo le melemo eo ba e fumang ha batho e le litho. O re ke lekhetlo la bobeli ba kena letšolong lena la ho phahamisa moea oa boikopanyo kahar'a batho ba nang le bokooa.

Mokhatlo ona o thakhotse ketelo ea ona Sekolong sa Ithuseng Rehabilitation Centre, se sebetsanang le ho fana ka thupelo ho batho ba nang le bokooa.



## LESOTHO ELECTRICITY AND WATER AUTHORITY PUBLIC NOTICE ON LESOTHO ELECTRICITY COMPANY'S APPLICATION TO INCREASE ELECTRICITY TARIFFS FOR THE MULTI YEAR PERIOD

2023/24 – 2025/26

### A. Introduction

The Lesotho Electricity and Water Authority (LEWA) informs Electricity Supply Industry (ESI) stakeholders and the general public that the Lesotho Electricity Company (Pty) Ltd (LEC) has filed an Application for upward adjustment in electricity tariffs for various customer categories for a multi-year period 2023/24-2025/26. The Application was submitted on 28 September, 2023 and it is in line with Section 24 (3) of the LEA Act 2002 as amended (hereafter referred to as the Act). LEC holds a Composite Licence issued in terms of Section 50 of the Act.

### B. The Application and Tariff Drivers that LEC cites therein

LEC has requested increases of 23%, 15% and 15% on both Energy and Maximum Demand (MD) charges across all customer categories for the Financial Years 2023/24, 2024/25 and 2025/26, respectively.

The proposed tariff adjustments will translate into a Revenue Requirement (RR) of **M2.09 billion, M2.10 billion and M2.13 billion** for the Financial Years 2023/24, 2024/25 and 2025/26, respectively. Table 1 below presents the breakdown of the RR as cited in the Application.

**Table 1: Summary of LEC's Revenue Requirement**

Aggregated Revenue Requirement	Projected Costs (in Maloti)		
	2023/24	2024/25	2025/26
Generation	1 183 348 581	1 219 099 262	1 254 849 942
Depreciation	181 224 161	178 657 022	178 086 605
Operating Expenses	379 343 443	346 729 847	332 301 533
Return on Capital	350 224 051	357 663 409	365 238 748
<b>Total</b>	<b>2 094 140 236</b>	<b>2 102 149 540</b>	<b>2 130 476 828</b>

### C. Invitation for Participation in Public Consultations

In accordance with Section 24 (6) of the Act, the ESI stakeholders and the general public are invited to participate in public consultations presented in Table 2 below:

**Table 2: Public Consultations Schedule**

Activity/Task	Date	Time
Publication of the LEC's Multi-Year Tariff (MYT) Application for public comments in the media	18 January 2024	08:00 hours
Closing date for submission of written comments from stakeholders/public	13 February 2024	17:00 hours
<b>Radio Streaming and Simultaneous Broadcast Group 1</b> 1. Radio Lesotho 2. Radio Maria Lesotho (Host) 3. KEL Radio 4. Thato-ea-Hau FM 5. MoAfrika FM	29 January 2024	10:00-12:00 hours
<b>Radio Streaming and Simultaneous Broadcast Group 2</b>	30 January 2024	12:00-14:00 hours

1. People's Choice FM
2. Radio Maria Lesotho (Host)
3. Harvest FM
4. Tšenolo FM
5. Moeling FM

Mafeteng Community Radio	30 January 2024	09:00-12:00 hours
Tšetšetha TV Program	24 January 2024 31 January 2024	20:30-21:30 hours 20:30-21:30 hours
Meeting with Key Stakeholders, LEWA Conference Room	02 February 2024	09:00 -13:00 hours
Mokhotlong, Mokhotlong Hotel	06 February 2024	08:30-13:00 hours
Thaba-Tseka, Motherland Hotel	08 February 2024	08:30-13:00 hours
Radio Souru	06 February 2024	07:00-08:00 hours
Qacha's Nek, New Central Hotel	06 February 2024	09:00-13:00 hours
Pheshekwe Qhili FM	07 February 2024	07:00-08:00 hours
Quthing, Kubung Hotel	07 February 2024	09:00-13:00 hours

Copies of the Application can be obtained from LEWA offices located in Maseru, Moposo House, Level 7. Alternatively, copies may be downloaded from the Authority's website at <https://www.lewa.org.ls/tariff-applications/>. Stakeholders who are residing in the districts of the country may access copies of the Application from the District Administrators' offices from 24 January, 2024.

### D. Invitation for Public Comments

In terms of Section 24(6) of the Act, stakeholders and the general public are invited to make and forward their comments on the reasonableness of the proposed tariff adjustments in the Application before LEWA makes a final determination. The deadline for receiving written comments is 13 February, 2024.

### Comments or enquiries may be sent to:

The Manager-Economic Regulation  
Economic Regulation Department  
7th Floor Moposo House, Maseru  
P/Bag A315  
Maseru 100  
Email: [Isekantsi@lewa.org.ls](mailto:Isekantsi@lewa.org.ls)  
Or  
[secretary@lewa.org.ls](mailto:secretary@lewa.org.ls)  
Tel : 22 312479  
Fax : 22 315094